


EAST ASIAN LIBRARY
RM 2049 ROBARTS LIBRARY
UNIVERSITY OF TORONTO
TORONTO, CANADA M5S 1A5

漢魏六朝百三家集

梁

江醴陵

第七十一冊



江醴陵集卷之二

梁 濟陽江 淹著

明 太倉張 溥閱

奏記

奏記南徐州新安王

伏惟明公殿下。列譽椒璧。蜚聲冲漢。爰求儒雅。
傍招異人。削赤野之玉翦。燕山之金。至如淹者。
東國之徒步耳。方歛影逃形。匡坐編蓬之下。遂
遭煙露餘彩。日月未光。惟恩知泰。變色薰心。淹

聞齊石旣撫，無待巴人之唱。柏臺已構，甯俟不
才之木。淹幼乏鄉曲之譽，長匱芹藻之德。豈宜
炫璞鄭氏，獻鳳楚門哉。願避職吏，緩其召書。

牋

到主簿日詣建平王牋

淹乃庸人，素非奇士。旣慙鄒魯儒生之德，又謝
燕趙俠客之節。徒以結髮衛次，暫聞仁義，常欲
永辭冠劔，弋釣畎壑。而身輕恩重，猥奉末光，枉
白璧之惠，降黑貂之私。因茲感激，未能自反。負
金羈于淮吳，從後車於河楚。竟不能曜丹艧，騰
英聲，絕白雲，負蒼梧。至可知矣。不謂咸池再揮
瑤光，重照開高天之慈；布厚地之施，承命以驚

巡走且失。淹聞古人爲報，常有意焉。至乃一說之効。齊王動色。一劔之感。趙王解衣。孤心迴鑒。有殞自天。

被黜爲吳興令。辭建平王牋。

淹本遷徙之徒，非有儒墨之能，亦以轉命溝間。待賓巖下。誤得步修。梠循高軒。伏層檻。坐曲池。承翠河之潤。降璇日之光。載筆奉后。盛飾立朝。於山東百姓。亦已殊甚。雖蓐蝼蟻。拭黃塵。不足以塞惠。而小人狼狽。爲鬼爲蜮。山淵所容。衣劔。

不貸。黥赭幽圜。皆非報責。仰遭大道之行。草木
勿踐。輟鑊歛火。吹鳧拾骨。濯以河漢之流。曝以
秋陽之景。叢然黔首。豈不載天。竊思伏阜九載。
齒錄八年。以春以秋。且恩且顧。竟不能抑黑質。
揚赤文。抽精膽。報慈光。而自爲擁腫之異木。卒
成踴躍之妖金。所謂孽由已作。匪降自天。猶沐
造化餘靈。宥以遐邑。方蒙被霜露。裹糧洲島。缺
鑿山楹爲室。永與鼃鼃爲羣。猶蹶者不忘起。盲
者不忘視。况罪溢朔方。尚駐一等之刑。咎過朱

崖猶緩再重之施。金石無知。何以識答。昔河濟
荆吳。必獲陪從。京輔關轂。長奉帷席。德音在耳。
話言如昨。淹迺梁昌。自投東極。晨鳥不蜚。遷骨
何日。一辭城濠。旦夕就遠。白雲在天。山川間之。
眷然西顧。涕下若屑。

到功曹叅軍詣竟陵公子良牋

竊惟明使君鉞下道耀神源。德鑄靈極。誕涵天
聽。資河炤聖。譽拂絃外。芳激震中。故衡梁孕秀。
璿璣流品。變瑤光之暉。贊玉燭之色。功邁翊殷。

績起匡漢。是以赤瑕瓊寶之文。睇影而負集。青
龍遺風之乘。晞光而遠至。如民者蓋不足美。所
志不出繒販。所學不遺祝筮。業異儒墨。行乖曾
史。旣乏修短之術。又慙啓塞之辨。不能伏軾蹲
衡。驚燕趙之郊。黃金橫帶。馳澠淄之幣。語默孚
緒。圓方靡樹。謬以一氣之微。徼百載之會。躬奉
英睿。身蒙青艫。故以潤厚累璧。恩重兼金。不悟
懸黎降景。靈河瀉潤。復獲執羈。蘭陳迎笏。桂序
漏越之琴。竊莊文之價。缺齧之劍。盜項襄之名。

心羞秦媵。志慮楚犢。抱魄踴躍。憂集如熏。鐫感
何日。銘報焉期。爲國。其楚。持澤蘭刺。與終卦氣。

英。魯。其。榮。青。艱。效。以。聞。早。累。璧。恩。重。兼。金。不。剖。
辭。同。大。製。博。通。以。一。孫。之。對。將。百。姓。之。會。浪。奉。
所。濟。無。賦。之。收。資。金。楚。帶。蠅。蠅。出。之。帶。請。爆。罕。
史。到。之。對。賦。之。術。又。慈。容。塞。之。難。不。指。舟。掉。輒。
志。不。出。辭。題。想。學。不。數。野。楚。樂。異。雷。墨。之。乖。曾。
辭。也。風。之。乘。解。決。而。數。至。收。只。昔。蓋。不。只。樂。詞。
辭。也。風。之。乘。解。決。而。數。至。收。只。昔。蓋。不。只。樂。詞。

啓

爲建平王慶改號啓

竊以皇衢永謐，則玉厯惟禎。國慶方夷，則繩澤式茂。故五鳳協年，甘露應號。況今道潤衍溢，頌祉載繁。嘉生蠲慶，風雲瑞節。旣覲昭晨，方鑄昌化。延守一隅，無以自屈。不勝荒情。

爲建平王讓鎮南徐州刺史啓

臣言臣誓惟殃釁，頻寫曲折。慊慊狂愚，冀蒙哀弔。而聖旨懸嚴，便賜斷表。神乖意失，音影何地。

吞悲茹號情膽載絕臣荒昧神氣爰自幼稟分
踰鼎貴秩高外州臣乏素能或所不任况在憂
年必取黜辱特爲開非常之恩借權製之義素
禮滅經實翦治本臣又能身祈命請一感天地
躑躅表啓心容已覩猶疑大道之行墨綬不與
孝治天下通喪獲遂陛下覆被仁明品物無漏
豈於微臣獨不蠲鑒焦鯁在躬輒復塵觸伏願
暫輟聽覽少憐苦草則臣死之日猶生之年臨
啓恍惚竟識無主不勝殞越怵息之心

爲建平王謝賜石硯等啓

臣言奉勅賜石硯及法書五卷。天旨又以臣書
小進更使勤習。敬閱籀篆。側觀硯功。張衛慙奇。
金瓊羞麗。臣夙乏翰能。素謝篇伎。空賁恩輝。徒
隆慈飾。方停煙墨。永砥學玩。仰結聖造。伏銘私
荷。不任下情。

爲建平王謝玉環刀等啓

奉勅賜玉環刀等。五種珍器。贐。

缺

伏蒙猥降飾

軼采。朱跨影懸魄。崑岡歸琛。關山慙寶。謹襲緹

素以克握睇垂光既深銘佩更積不任下情

爲蕭領軍讓司空并敦勸啓

臣某言臣忝心之請丹識以傾詔旨沖挹便賜
斷表伏聞當遣王人猥垂獎勸仰天光休俯增
驚厲中謝臣以爲槐鉉之任百王攸先具司是
屬冠冕式瞻化曜昌輝連基政務事深崇替迹
豫興衰故道富一時則風行明令才乏通權則
山摧河泣既澆汨蒼祗將紊毀身國臣進退惟
疑再三自顧實以陋情悲忘寵極但畏軼超疲

伍。迺叅鼎軸。無德而貴。豈敢偷存。才怯任重。物
所不恕。故弱識褊。槩頻布前辭。枯木朽株。永隔
蠲恕。豈特大車方塵。小雅有廢而已哉。將據致
寇之悔。取鑒於茲矣。且皇華之命。居上之鴻私。
鳳舉之招。爲下之殊榮。國勲必書。史不謬牘。況
臣連牧圉岳。董率職方。旣鑠近古。垂耀中葉。揆
望揣實。爲泰已甚。而迺復降朱輪之使。方枉青
冊之勸。寤寐惓灼。諒無以任。輒重素誠。冒覬神
炤。伏願皇靈。特垂開愍。賜停正台之職。并免敦

勸之使餘所榮忝誓不敢辭。肅恭外屏。祈迴恩授。則於臣慊款。復爲惠造。不任憂戴匪惶之情。
爲蕭太尉子姪拜領軍江州兗州豫州淮

南黃門謝啓

臣公言臣頻結崇寵。亟延上爵。休恩動俗。烈榮振古。鴻品清飾。已藹金圖。秀鼎號銘。共茂璫篆。永言戚慮。鑒寐殷心。況乃秩洽朝門。慶霑國珮。弱息臣諱嶷。映晃等文。不昭典武。不定功。出內帷間。升降貂綬。或振迹領候。職贊禁錡。或騰光

江甸。任鈞屏翼。河充衝要。旣濫北門之管。淮豫
險捍。又謬西偏之寄。兄子臣鸞。忝守近畿。嫡孫
臣某。載華省闈。皆倏忽晷景。頻煩升荷。雖咸罄
愚識。恪居匪替。豈足以少塞神渥。裁酬皇眷。囂
黷一盈。慙厲彌積。談天之辨。不能爲臣陳辭。雕
龍之文。無以爲臣飾愧。靜然肅念。裴徊交集。不
任憂感。沐浴之情。

江醕陸集

卷二

八

上書

獄中上建平王書

昔者賤臣叩心飛霜擊於燕地。庶女告天振風襲於齊臺。下官每讀其書。未嘗不廢卷流涕。何者。士有一定之論。女有不易之行。信而見疑。貞而爲戮。是以壯夫義士。伏死而不顧者也。下官聞仁不可恃。善不可依。謂徒虛語。乃今知之。伏願大王鑒停左右。小加憐察。下官本蓬戶桑樞之民。布衣韋帶之士。退不飾詩書以驚愚。進不

買名聲於天下。日者謬得升降承明之闕。出入
金華之殿。何嘗不局影凝嚴。側身扃禁者乎。竊
慕大王之義。復爲門下之賓。備鳴盜淺術之餘
豫三五賤伎之末。大王惠以恩光。顧以顏色。實
佩荆卿黃金之賜。竊感豫讓國士之分。常欲結
纓伏劍。少謝萬一。剖心摩踵。以報所天。不圖小
人固陋。坐貽謗缺迹。墜昭憲身限幽圖。履影弔
心。酸鼻痛骨。下官聞虧名爲辱。虧形次之。每一
念來。忽若有遺。加以涉旬月。迫季秋。天光沈陰。

左右無色，身非木石，與獄吏爲伍，此少卿所以
仰天槌心，泣盡而繼之以血者也。下官雖乏鄉
曲之譽，然嘗聞士君子之行矣，其上則隱於簾
肆之間，臥於巖石之下，次則結綬金馬之庭，高
議雲臺之上，次則虜南越之君，係單于之頸，俱
啓丹冊，並圖青史，寧當爭尺寸之末，競錐刀之
利哉？下官聞積毀銷金，積讒糜骨，遠則直生取
疑於盜金，近則伯魚被名於不義。彼之二子，猶
或如是，況在下官，焉能自免？昔上將之恥，絳侯

幽獄名臣之羞。史遷下室。至於下官。當何言哉。
夫以魯連之智。辭祿而不返。接輿之賢。行歌而
忘歸。子陵閉關於東越。仲蔚杜門於西秦。亦良
可知也。若使下官事非其虛。罪得其實。亦當鉗
口吞舌。伏七首以殞身。何以見齊魯奇節之人。
燕趙德歌之士乎。方今聖歷欽明。天下樂業。青
雲浮洛。榮光塞河。西汨臨洮。狄道非距。飛狐陽
原。莫不浸仁沐義。昭景飲醴。而下官抱痛園門。
含憤獄戶。一物之微。有足悲者。仰惟大王少垂

明白則梧邱之冤不愧於沈首鵠亭之鬼無恨
於灰骨不任肝膽之切敬因執事以聞此心既
照死且不朽

江醕陽集

卷二

二

書

與交友論隱書

淹者海濱窟穴。弋釣爲伍。自度非奇力異才。不足聞見於諸侯。每承梁伯鸞臥於會稽之墅。高伯達坐於華陰之山。心常慕之。而未能及也。嘗感子路之言。不拜官而仕。無青組紫綬。龜紐虎符之志。但欲史厯巫卜。爲世俗賤事耳。而彰然十載。竟不免衣食之敗。何則。性有所短。不可韋弦者。有五。一則體本疲緩。臥不肯起。二則人間

應修。酷嬾作書。三則賓客相對。口不能言。四則性甚畏動。事絕不行。五則愚婦妄發。輒被口語。有五短而無一長。豈可處人間耶。知短而不可易者。所謂輪椎分定也。猶如雞鷺之有毛。不能得鸞鳳之光采矣。况今年已三十。白髮雜生。長夜輾轉。亂憂非一。以溘至之命。如星殞天。促光半路。不攀長意。徒自欺取。筋驚髓冷。殊多災恙。心頑質堅。偏好冥默。旣信神農服食之言。久固天竺道士之說。守清淨煉神丹。心甚愛之行善。

業度一世。意甚美之。今但願拾薇藿。誦詩書。樂天理性。歛骨折步。不踐過失之地耳。猶以妻孥未奪。桃李須陰。望在五畝之宅。半頃之田。鳥赴簷上。水匝階下。則請從此隱。長謝故人。若乃登峩嶬。度流沙。殄金石。讀仙經。嘗聞其驗。非今日之所言也。誰謂難知。青鳥明之。貴布筆墨。然亦焉足道哉。

報袁叔明書

僕知之矣。高臯爲別。執手未期。浮雲色曉。悵然

竄飛前辱贈書知命僕息心越地採藥稽山友人幸甚去歲迫名茂木冬盡不獲有報引領於邑情詎可及足下推僕者不一二談也僕聞狂士之行有三竊嘗志之其奇者則以紫天爲宇環海爲池裸身大笑被髮行歌其次則堅坐崩岸僵臥深窟朝食松屑夜誦仙經其下則辭榮城市退耕巖谷塞逕絕賓杜牆不出然者皆蓋爲西山之餓夫東國之黜臣而况其鄉黨乎或有社稷之士入而忘歸則爭論南宮之前衛主

於邪、伏身北闕之下、納君於治、至乃一說之奇、
驚畏左右、一劍之功、震慄鄰國、夫能者惟橫議、
漢庭怒髮燕路、且猶不數、而況於鄰里乎、若僕
之行止、已無可言矣、材不肖、文質無所直、徒以
結髮游學、備聞士大夫言曰、在國忠、處家孝、取
與廉、交友義、故拂衣於梁齊之館、抗手於楚趙
之門、且十年矣、容貌不能動人、智謀不足自遠
竟慙君子之恩、卒離飢寒之禍、近親不言、左右
莫教、涼秋陰陰、獨立閑館、輕塵入戶、飛鳥無迹、

命保琴書而守妻子其可得哉故國史小官也而子長爲之執戟下位也而子雲居之僕非有輕車驃騎之略交河雲險之功幸以盜竊文史之末因循卜祝之間故俛首求衣歛眉寄食耳若十口之糲去爲飢寒從疾舊里斥歸故鄉箕坐高視舉酒極望雖五侯交書羣公走幣僕亦在南山之南矣此可爲智者道難與俗士言也方今仲秋風飛平原影色水鳥立於孤洲蒼葭變於河曲寂然淵視憂心辭矣獨念賢明蚤世

英華殂落。僕亦何人。以堪久長。一旦松柏被地。墳壟刺天。何時復能銜杯酒者乎。忽忽若狂。願足下自愛也。

勅爲朝賢答劉休範書

昔媯道鼎昌。干羽未能戢。姬德昭宣。長旌猶卷。舒焚衣毀冕。有自來矣。皇宋靈武誕命。聖道鬱宏。三后連光。四聖沓軌。或經天緯地。構紫靈之符。調風偃海。隆黃旗之祚。莫不頌滿金石。聲影宇宙者也。暨我太宗明皇帝。惟岳降聖。重耀函

夏延禮壁臺。訪道衢室。平陽之斥。卷迹慙靈。空
同之君。歛功謝德。是以彩雲祥風之瑞。布濩區
中。梯山棧火之俗。欵獫請吏。跨商軼夏。洗周滌
漢。道澤優衍。猶不道封禪。遐靈在天。餘惠無泯。
主上文明金相。穆然玉色。履璧之禎。獲珪之應。
著在紀歲。仁浸汙河。惠愛秋草。想亦君之所聞。
也。重以先帝靈略。潛通英轡。遠馭受話。言必忠
貞。方肅之臣。奉風聲必虔。恭匪懈之士。明時琴
瑟。鼎鉉之盛。且被於甯世。而忽覲來書。以愧以

慨君爲齊梁楚越之主。鼎貴一時。金玉滿堂。文
馬千駟。爵授湯沐。冠蓋於道。惟名尊崇。誰與爲
雄。而出言效尤。吐音入戾。舉旗類社。志竊神禁。
稱兵歛衆。遂窺外關。今朝無闕政。頓構凌上之
節。室無孽豎。坐生莫大之豐。鳴梟赭衣。號與徒
黨。主萃淵藪。甯滋之甚。不臧不軌。不忠不義。未
有若斯者也。宗枝之釁遠則吳楚。見禽於一壁。
盤石之璧。近則江荆。面縛於小將。成敗蘭艾之
鑒。又亦君之所知也。聞彼虹飲鼠舞之異。早見

物徵河北隴上之譴。已露童詠。所謂妖由人作。
孽不可逃。然桓侯之患。良助寒心。今羽林黃頭。
絡驛爭引。熊渠攸飛。首尾電發。伏波樓船。掩江
蔽汜。渡遼甲卒。克野布陽。加以先天蓋世之略。
蕩海拔山之威。任輔沛陳。羽林鷁鷁。露動龍驤。
精騎風驅。然後六師雲起。九軍星連。蜺旌外沔。
虹艦中水。金甲映平陸。鐵馬炤長原。楚南嶽而
永慨。瞰九派而懷恐。伐罪弔民。復驗於茲。甫刑
三千。唯此爲大。僕才等不羈。志漚丹款。故奏禍

福行矣。悵然。袁楮。劉蕭等疏。

江酉陽集

論

無爲論

吾曾迴向正覺歸依福田友人勸吾仕吾志不改故著無爲論焉

有奕葉公子者聯蟬七代冠冕組望多素純黼衣繡裳負長劔而耿耿佩鳴玉而鏘鏘時遊稷下或客於梁間英雄而豹變聽利害以龍驤乃動朱履而馳寶馬振玉勒而曜金羈之無爲先生之門問曰先生智德光融嵩華無得以方其

峻道義清遠、溟海不足以喻其深、無學不窺、無
事不達、容儀閒靜、言笑溫雅、至如釋迦三藏之
典、李君道德之書、宣尼六藝之文、百氏兼該之
術、靡不詳其津要、而採摭冲玄、煥乎若覩於鏡
中、炳乎若明於掌內、余聞天地之大德曰生、何
以聚人曰財、是故老聃以爲柱史、莊周以爲圉
史、東方持戟而不倦、尼父執鞭而不恥、實萬古
之師範、一時之高士、先生嘉遁卷迹、養德不仕
乃列子之所待、非通天下之至理、雖江海以爲

榮實縉紳之所鄙。先生倏爾笑而應之曰。富之
與貴。誰不欲哉。乃運而不通也。夫忠孝者國家
之急務也。申生伍員。不得志也。懷道抱德。立風
之所尚。楊雄東方。其職未高也。其大學者。不過
儒墨。亦栖栖遑遑。多有不遂也。子所引之士者。
情雖欲之。志不行也。憂喜不移。其情故可爲道
者也。過此已往。焉足言哉。吾聞大人降迹廣樹
慈悲。破生死之樊籠。登涅槃之彼岸。闡三乘以
誘物。去一相以歸真。有智者不見其去來。有心

者莫知其終始。使得湛然常住。永絕殊塗。無變
無遷。長祛百慮。靜然養神。以安志爲業。欲使自
天祐之。吉無不利。舒卷隨取。進退自然。遁逸無
悶。幽居永貞。亦何榮乎。亦何鄙乎。子其得之。吾
何失之。塵內方外。於是乎著。公子忽然而有慚
德。逡巡而退。

頌

閩中草木頌十五首

有序

僕一命之微，遭萬代之幸，不能鐫心礪骨，以報所事，擢翼驤首，自致丹梯，爰乃恭承嘉惠，守職閩中，且僕生人之樂，久已盡矣，所愛兩株樹，十莖草之間耳，今所鑿處，前峻山以蔽日，後幽晦以多阻，饑餒搜索，石瀨芟芟，庭下有故池，水常決，雖無魚梁釣臺，處處可坐，而葉饒冬榮，花有夏色，茲赤縣之東南乎，何其奇異也，結莖吐秀

數千餘類、心所憐者、十有五族焉、各爲一頌、以
寫勞蒐、

金荊

江南之山、連障連天、旣抱紫霞、亦漱絳煙、金荊
嘉樹、涵雲宅仙、嫵節詎及、幽意誰傳、

相思

竦枝碧澗、臥根石林、日月斷色、霧雨恒陰、綠秀
八炤、丹實四臨、公子不至、山客徒尋、

豫章

伊南有材，匪桂匪椒，下貫金壤，上籠赤霄，盤薄
廣結，捎瑟曾喬，七年乃識，非曰終朝。

栟櫚

異木之生，疑竹疑草，攢叢石逕，森蓰山道，煙岫
相珍，雲壑共寶，不華不縟，何避工巧。

杉

桐梓舊麗，松栝稱奇，焉如茲品，獨秀青崖，羣木
歛望，雜草不窺，長入煙氣，永參鸞螭。

榿

木貴冬榮、檉實寒色停、黛峰頂、插翠石側、碧葉
菴藹、頰柯翕、艷方陋筠、檟遠笑荆棘、

楊梅

寶跨荔枝、芳軼木蘭、懷藥挺實、涵黃糝、丹鏡日
繡壑、炤霞綺、巒爲我、羽翼委君玉盤、

山桃

惟園有實、惟山有叢、丹礪驚露、紫榮繞風、引霧
如電、映煙成虹、伊春之秀、乃華之宗、

石榴

美木艷樹誰望誰待綠葉翠萼紅華絳采炤列
泉石芬披山海奇麗不移霜雪空改

木蓮

迸采泉壑騰光淵邱緇麗碧巖紅艷桂洲山人
結侶靈俗共遊時至不採爲子淹留

石菖蒲

藥實靈品爰乃輔性却痾衛福蠲邪養正縹色
外妍金光內映草經所珍仙圖是詠

黃蓮

黃連上草丹砂之次禦孽辟妖長靈久視驂龍
行天馴鳳匝地鴻飛以儀順道則利

薯蕷

華不可炫葉非足
憐微根儻餌棄劍爲仙黃金
共壽青鱗爭年君謂無妄我驗衡山

杜若

山中杜若嘉爾翠質不奇不俗載華載實同銜
夕露共炯朝日夷陂無二沈冥如一

藿香

桂以過冽，麝以太芬，摧阻天壽，夭折人文。詎及
藿香微馥，微薰攝靈，百仞養氣，青雲。

讚

銅劍讚 有序

永明初始造舊宮鑿東北之地皆平岡迤隴尤
多古冢墓有人得銅劍長尺五寸余旣借看歎
其古異客有謂余曰古時乃以銅爲兵乎其可
得而聞不余笑而應曰此證據甚多殆不俟言
卿旣欲知輒具言之余按山海經曰昆吾之山
其上多赤銅郭璞注曰此山出金如火以之切
玉如割泥也周穆王時西戎獻之尸子所謂昆

吾之劍也越絕書曰赤堽之山破而出錫若邪之谿涸而出銅歐冶鑄以爲純鉤之劍又汲冢中得一銅劍長三尺五及今所記干將者亦皆非鐵明古者以銅錫爲兵器也周書稱穆王時征犬戎得昆吾之劍火浣布長尺有咫又有鍊銅赤刀割玉如泥焉又左傳僖公十八年鄭伯始朝于楚楚賜之金旣而悔之盟曰無以鑄兵故以鑄三鐘杜預注云楚金利故也古者以銅爲兵故禹貢云荆揚貢金三品余以爲古者語

質而難解。今者語文而易了。獨詩云元龜象齒。其實象牙也。書云厥包橘柚。乃黃柑也。金品上則黃。中則赤。下則黑。黑金是鐵。赤金是銅。黃金是金。黃金可爲寶。赤金可爲兵。黑金可爲器。韓子稱昔智伯繇之伐趙襄子。初晉陽襄子金將盡。問於張孟談。孟談對曰。吾聞董安于治晉陽也。公室悉以銅爲柱質。君可發而用之。於是發之。有餘金矣。謂此據蓋可知焉。又昔夏后氏使九牧貢金。鑄九鼎於荆山之下。于昆吾氏之墟。

白若甘攬之地。圖其山川奇怪。以形于鼎。使民知神姦。不逢其害。以定其祥。鼎成三足而方。不炊而自沸。不昇而自藏。不遷而自行。九鼎旣成。定之國都。桀有昏德。鼎遷於商。殷紂暴虐。鼎遷於周。每人主休明。鼎雖小而重。其姦回昏亂。雖大而輕。及周顯王三十二年。姬德大衰。乃淪入泗水。秦始皇之初。見于彭城二十七年。始皇東遊。大發徒出之。而不能得焉。後漢武帝賓禮百神。于汾陰得大鼎。時人以爲九鼎。其祥不可得。

而審也。且荆軻刺秦王之日。七首擊銅柱。銅柱
火出。則古者非直以銅爲七首。亦以爲殿柱也。
且始皇之世。長狄十二。見於臨洮。身長三丈。足
跡六尺。於是始皇歛天下之兵。鑄而象之。故西
京賦云。高門有閼。列坐金狄是也。又造阿房之
宮。其門悉用磁石。磁石喻鐵。以防外兵之入焉。
以此推之。明知春秋迄于戰國。戰國至于秦時。
攻爭紛亂。兵革互興。銅既不克給。故以鐵足之。
鑄銅旣難。求鐵甚易。是故銅兵轉少。鐵兵轉多。

年甚一年，歲甚一歲，漸染流遷，遂成風俗，所以鐵工比肩，而銅工稍絕。二漢之世，逾見其微。及漢建安二十四年，魏文帝爲太子時，鑄三寶刀，二七首，天下百鍊之精利，而悉是鑄鐵，不能復鑄銅矣。按張華博物志，亦稱鑄銅之工，不復可得。唯蜀地羌中，時有解者，由此言之，斯妙久絕。余謂不復能鑄銅者，正當不能使利如霜雪，光如雲霞，陸斬犀兕，水斷蛟龍，豈復不能鑄銅鑪，銳燈耶？然今太極殿前兩大銅鏡，卽周景王鑄。

也製作精巧獨絕晚世今之作必不及古猶今
鏡不及古鏡今鐘不及古鐘矣昔余爲吳興令
鑿池又獲銅箭鏑數十枚時有人復於彼山中
伐木得銅斧一口古銅鑄爲兵豈爲一據故備
言其詳以發子之蒙矣古貴銅賤鐵非獨此事
按皇覽帝王冢墓記稱吳王闔閭冢銅槨三重
永池六尺玉鳧之流扁諸之劍三盤郢魚腸之
劍在焉秦始皇冢亦以銅槨水銀爲江河關東
賊發之至銅槨而取銅深大不可多得因此穴

塞漢 思王家時奢侈皆生葬取愛幸奴婢蓄穀爲銅窓以通殉葬者氣息兼以水火守冢給呼召數十年乃不復聞聲矣晚世之葬無復此例然猶自大奢大富大盛或傾一國之財或竭一家之寶或爭爲宏麗或競相高尚前漢奢于後漢魏時富于晉世中原旣夷至於江左時天下凋喪制度日衰富貴之家猶或厚葬然論古論曩亦減損千萬倍矣世愈貧狹哀禮愈薄又往古之事棺皆不用釘悉用細腰其細腰之法

長七寸、廣三寸、厚二寸五分、狀如木秤、兩頭大
而中央小、仍鑿棺際而安之、因普漆其外、一棺
凡用細腰五十四枚、大略如此、亦可謂至巧矣
其法既絕、亦有銅釘、銅釘之體、皆如今柘釘形
也、銅釘既滑、多被發掘、自義熙以來、乃以柘伐
銅爰及明器之屬、亦多減省、必不得已、乃用烏
牙焉、相與皆用素棺、不得施漆、及自棺之外、一
無所設、既由貧富之懸、兼以避患之及耳、故爲
此讚、以明古今銅鐵之兵刃葬送之事焉、乃成

讚曰

悠悠開闢、或聖或賢、蚩尤鑄銅、爲兵幾年、天生
五才、實此爲先、旣古旣曩、誰測誰傳、紛綸百代、
事無不異、况迺金鐵、國之利器、風胡專精、歐冶
妙思、於昔則出、於今則秘、聞之釋經、萬物澹薄、
在古必厚、在今必惡、徒侈徒異、徒鏟徒削、聊舉
一槩、以明鴻略、

雲山讚四首

有序

壁上有禪畫、皆作山水好勢、仙者五六、雲氣

生焉悵然會意題爲小讚云、

王太子

子喬好輕舉、不待鍊銀丹、控鶴去窈窕、學鳳對
嶺岈、山無一春草、谷有千年蘭、雲衣不躑躅、龍
駕何時還、

陰長生

陰君惜靈骨、珪碧詎爲寶、日夜名山側、果得金
丹道、憂傷永不至、光顏如碧草、若渡西海時、致
意三青鳥、

白雲

紫煙世不覲，赤鱗庖所捐。白雲亦海外，蓋蓋起三山。
蕭瑟玉池上，容裔帝臺前。欲知青都裏，乘此乃登天。

秦女

青琴旣曠世，綠珠亦絕羣。猶不及秦女，十五乘絳雲。
璧質人不見，瓊光俗詎聞。願使洛靈往，爲我道奇芬。

誄

齊太祖高皇帝誄

日月鬱華，風雲黯色，傷動紫微，悲匝璇極，嗚呼
哀哉。粵夏四月辛卯，將遷座于泰安陵，龍鑾旣
整，羽衛以陳，深酸舊物，掩咽故臣。嗣皇帝永訣
丹掖，叫號青墀，攀神光之一絕，慟遠邇之何期。
弓劍有慕，纂德寫辭，僉曰：若稽古聖，璿圖靈鏡，
星驅發祥，電光啓命，誕惟弱齡，惠志聰情，如金
如璧，爰秀爰英，於鑠冠歲，騰華流藝，允文允武，

克明克睿，聿尚登學。嚴道尊師，宣敷五禮。優游
六詩，上炫舊滯。旁鏡前疑，才罄艷采。筆盡麗辭，
在友斯悌。于親伊孝，儉泰共色。夷阻一貌，遊情
騶矩。縱心蹈教，鄉術式慕。州閭是效，業優登仕。
先哲攸懋，矧乃寥廓。淵規邃構，官府天地。舟輿
宇宙，龍靜鳳戢。歛奇揜秀，昔在帝劉。王室放命，
狡焉僞誕。晦朔陵正，鋒車北軼。燿火南盛，太祖
時乘。爰茲發迹，塞井滅勲。夷竈龕敵，賞鏤王圖。
功糴帝冊，乃厲中葉。天未歛難，兵百袁曹。禍十

楚漢吳地前崩、越壤首亂、街號燿盛、火列金斷、
聚甲如陵、獻俘爲觀、非楚倔强、曾未屈膝、雲屯
被野、魚麗亘日、廟勇旣消、國圖方匱、神冊天開、
雄略世出、凶劍鱗沈、醜戈羽逸、隻騎不還、跨輪
無匹、厥庸戾止、離珮委他、榮鬱閭闔、寵重山河、
皇彝有文、朝采方藹、頻煩金紱、左右緹蓋、毗戎
肅禁、參輦侍旆、譽馥區中、道夢氓外、河濟國險、
淮泗邦塵、要藩重設、匪賢則親、亦旣推較、擁土
庇民、聲稜絕俗、威瞻殊隣、宋主陵遐、紫殿遏密、

話言之詔，貽在英粹。寅亮大寶，敷綸妙秘。世識
機鑒，物宗淵懿。無復匪鍊，靡與不洎。三階旣馴，
五精惟至。彭蠡九澤，地盡襟製。亦有劉範，衣纓
是絕。躍馬山岫，泛舟河滙。縞綺星流，紅旗電結。
鳩翼競扇，豺牙爭礪。禍纏紫禁，兵交丹衛。瑤祀
若旂，金宸如綴。朝野傾儀，咸歸上德。實賴至公，
瀉家提國。懷險實泰，危亡必克。機筭朝旦，功定
曛黑。妙物更配，具章重則。深居撫外，遙棲繇默。
高秩方臻，元禮有序。王曰：念哉！暉寵是與，職褒

宮閣任卷文武，飾華麗貂，縈金疊組，宏猷溢俗。
曾芬冠古，憬彼朱方，亦惟宗秩，陰圖食鼎，潛謀
貫日，征輪未誓，偏旗銜律，原燎旣寂，世囂伊謐。
爰崇爰貴，以望以實，鴈縣告靜，象郡無虞，杳鬱
遠域，清麗瓊都，國填氓負，朝委事虛，實翳哲相，
嶽曜神居，功美旣損，道富去益，再紐契訓，重匡
禹迹，方同范張，濯情汾射，散簪山郊，解珮松石，
頽霞拂朝，蒼煙惜夕，韻屬玄經，恩流金液，靈厭
霸德，少帝告釁，滅慈滅養，抵仁抵信，枉獄炎鑪，

淫刑霜刃、剗忠剪義、樊稚斲櫬、慄慄萬氓、曰怨
曰震、妖蜺將崩、災裂昊蒼、況乃鼎國、資滌資匡、
臨朝闡命、遏昏立綱、事繇毗漢、義締翼商、旣綏
地職、亦懋天工、權輿典緯、俾作司空、黼黻珣戈、
祐宇升庸、徒賜先袞、爰永渥冲、實曰驃騎、卷迹
辭功、寰寓睦政、畿甸綸風、沈氏滔天、勃逆舊楚、
氣蹂黃池、志轢柏舉、裂禮紊度、毀經棄序、黑騎
黔山、朱旗頽渚、短兵相接、長鎗爲群、顥如海岸、
蠹似蒸雲、合乃霧激、離則霰分、荆國旣軼、郢縣

方焚袁劉二戾，焱馳煒發，聯謀制外，儲兵襲內。
釁激瓊殿，勢崩金闕，志乘玄璽，圖矯秘鉞。鴻妖
逝星，高祿棄月，惟時諸侯，上脫下競。圖服淆蕩，
實綴仁聖，輝耀國靈，導揚主命。曾規近晰，深暮
遠鏡，左輪朱頰，表裏斯定。七德飾歌，九功絳詠，
乃陟上鉉，寵文方輝，誕錫有秩，綵吹旌旗，贊政
瑤光，翊教太微。實曰太傅，爰登相國，緝民以禮，
綜祇以德，景福咸湊，芳猷允塞，羽泳式造，絃縣
是則，金湯無險，軌書攸同，迴迴寵迹，窈窈睿功。

寶珪黛壤，俾王于東。絢冊是敷，懋物旣崇。設業
設簾，丹懸碧鏞。於穆顯相，黎元時邕。冰州炎燄，
來獻其琛。鴈海龍關，亦柔好音。梁龜棧壘，越險
浮深。遠戎皆覲，上靈必臨。山吐石青，野降寶露。
瑞芝麗草，珍柯爛樹。人崩俗締，玄緯幽敷。瞻此
妙德，跂我王度。造滯炎旻，旣變至公。萎蕤嬌華，
文祖受終。大宋有訓，高撫萬邦。容豫慶雲，遊衍
南風。正服寶位，圓光玉繩。御繡懷古，負黼夙興。
邱礪必靜，淵漪咸澄。勛宸有作，黔牖其義。矜卑

廣慈合賤兼愛綴機劓賊輕章削罰迹去繁奢
情歸素一軒靡龍刻楹無丹密越賤申椒楚輟
靈橘陵寢起邑池藻誰縣遙館罕御離房空薦
惇教路宮淹神正殿斟酌信義左右律禮瑩彼
皇維燿茲國體胄業旣樹璧流方啟漢求金岫
吳寶銅塹寧若睿德讓駟却劍實才爲貴唯功
是念火職咸允雲官亦熙旣皇乃益匪稷伊夔
無舛巡風甯埃辯詩玉燭調文玄英最節乘山
呈瑞航海歸闕不曠景冊靡空歲月受緯機衡

兼甄詩史，孫韓各辦。莊墨異理，昭政往藹。洗鑠
前軌，逍遙星斗。徙倚涼雲，春飈方舞。秋鴻初分，
式誼式詠，載績載文。邈哉我后，淪泳賢聖。罄品
作號，盡物歸政。蒼黎汰歡，立靈刷慶。永戢嘉祉，
方寅景命。締詳有文，颺沛將掩。理昧人訛，道懸
世險。負略遺圖，忌華徇儉。文閭陳几，翌明告漸。
蜺僑鬪食，日月朏精。矧在乘輿，宇折宙傾。祲纏
鸞掖，悲赴紫扃。去璇臺之照，襲珠殯之冥。嗚呼
哀哉，惟宮低景。輦路巖光，側柏門之黯黯。泣松

帳之茫茫，上宮僻而詔御咽，群后慕而侍衛傷。
攢靈既儼，遠日以筮，鬱鬯既奠，龍酹方撤。素月
夜橫，翠煙曉結，縱虛金而下歛，吟空簫而增絕。
嗚呼哀哉！於是颯天駕而從綺輿，澁神行而撫
文輦，傍建春而南蹕，徑宜陽而東踐。尚蓋蓋而
未散，乍眇默而不轉，睇千乘之共吸，盼萬騎之
相泣。悲魏后之戀譙，惻漢主之懷沛，辭金陵之
薩義，降雲陽之杳藹。風奇響而駐軒，煙異色而
低旆。怨街邑之綵驂，弔原野之縞蓋。挽夫愴而

征馬凝痛縈盈其如帶、嗚呼哀哉、復林油雲重、
山減日、御房清淒、神路冥謐、昭徒肅肅、幽祇竦
蹕、攀光灑慟、臨泉澍泗、璫座長嚴、雕宮永闕、寂
帳寂兮寂、已遠夜、釭夜兮夜、何邃、嗚呼哀哉、

傳

袁叔明傳

友人袁炳字叔明，陳郡陽夏人。其人天下之士，幼有異才，學無不覽，文章俶儻，清贍出一時。任心觀書，不爲章句之學。其篤行，則信義惠和，意聲如也。常念蔭松柏，詠詩書，志氣跌宕，不與俗人交。俛眉暫仕，歷國常侍員外郎、府功曹、臨湘令。粟之入者，悉散以贍親，其爲節也如此。數百年，未有此人焉。至乃好妙賞文，獨絕於世也。又

撰晉史奇功未遂不幸卒官春秋二十有八與
余有青雲之交非直銜杯酒而已嗟乎斯才也
斯命也天之報施善人何如哉何如哉

自序傳

淹字文通濟陽考城人幼傳家業六歲能屬詩
十三而孤邈過庭之訓長遂博覽群書不事章
句之學頗留精於文章所誦詠者蓋二十萬言
而愛奇尚異深沉有遠識常慕司馬長卿梁伯
鸞之徒然未能悉行也所與神遊者唯陳留袁

叔明而已。弱冠以五經授宋始安王劉子真略。傳大義爲南徐州新安王從事奉朝請。始安之薨也。建平王劉景素聞風而悅。待以布衣之禮。然少年嘗倜儻不俗。或爲世士所嫉。遂誣淹以受金者。將及抵罪。乃上書見意而免焉。尋舉南徐州桂陽王秀才。對策上第。轉巴陵王左常侍。右軍建平王主簿。賓待累年。雅以文章見遇。而宋末多阻。宗室有憂生之難。王初欲羽檄徵天下兵。以求一旦之幸。淹嘗從容曉諫。言人事之

成敗。每曰。殿下不求宗廟之安。如信左右之計。則復見麋鹿霜棲。露宿於姑蘇之臺矣。終不以納而更疑焉。及王移鎮朱方也。又爲鎮軍參軍事。領東海郡丞。於是王與不逞之徒。日夜構議。淹知禍機之將發。又賦詩十五首。略明性命之理。因以爲諷。王遂不悟。乃憑怒而黜之。爲建安吳興令。地在東南。嶠外閩越之舊境也。爰有碧水丹山。珍木靈草。皆淹平生所至。愛不覺行路之遠矣。山中無事。與道書爲偶。乃悠然獨往。或

日夕忘歸。放浪之際。頗著文章。自娛在邑三載。朱方竟敗焉。復還京師。值世道已昏。守志閑居。不交當軸之士。俄皇帝始有大功於四海。聞而訪召之。爲尚書駕部郎。驃騎竟陵公參軍事。當沈攸之起兵西楚也。人懷危懼。高帝嘗顧而問之曰。天下紛紛若是。君謂如何。淹對曰。昔項強而劉弱。袁衆而曹寡。羽號令諸侯。竟受一劍之辱。紹跨躡四州。終爲奔北之虜。此所謂在德不在鼎。公何疑焉。帝曰。聞此言者多矣。其試爲我

言之淹曰、公雄武有奇略、一勝也、寬容而仁恕、
二勝也、賢能畢力、三勝也、民望所歸、四勝也、奉
天子而伐逆叛、五勝也、攸之志銳而器小、一敗
也、有威而無恩、二敗也、士卒解體、三敗也、搢紳
不懷、四敗也、懸兵數千里而無同惡相濟、五敗
也、故豺狼十萬、而終爲我獲焉、帝笑曰、君談過
矣、是時軍書表記、皆爲草具、逮東霸城府、猶掌
筆翰、相府始置、仍爲記室參軍事、及讓齊王九
錫備物、凡諸文表、皆淹爲之、受禪之後、又爲驃

騎豫章王記室參軍鎮東武令參掌詔冊並典國史既非雅好辭不獲命尋遷正員散騎侍郎中書侍郎淹嘗云人生當適性爲樂安能精意苦力求身後之名哉故自少及長未嘗著書惟集十卷謂如此足矣重以學不爲人交不苟合又深信天竺緣果之文偏好老氏清淨之術仕所望不過諸卿二千石有耕織伏獵之資則隱矣常願幽居築宇絕棄人事苑以丹林池以綠水左倚郊甸右帶瀛澤青春爰謝則接武平臯

素秋澄景。則獨酌虛室。侍姬三四。趙女數人。不
則逍遙經紀。彈琴詠詩。朝露幾間。忽忘老之將
至。淹之所學。盡此而已矣。

墓銘

宋尚書左丞孫緬墓銘

光靈維周，肇祀伊衛。炤分上代，鏡華中世。睿誕
降明，秀芳嗣烈。學惟物範，行實士節。容與書林，
優遊史藝。素巾俄冠，朱紱累轍。來訪詩逸，入詢
禮缺。麗名文質，齊影儒詰。慶履匪舒，沴氣遽結。
殯帷今旣晦，泉火今已閉。暖遺波於遥緒，颯流
馨於遠歲。

宋安成王右常侍劉喬墓銘

丹陽韞聖，豐鄉降賢。玉葉旣積，金徽方傳。乃毓
伊人，尅廣克宣。騰芬中屬，飛藻上年。杳杳虛素，
永永冲關。雲意霜拍，瓊立冰堅。家寶以瑩，國才
未甄。參錯報善，茫昧雲玄。歛魂幽石，委氣空山。
膚若流波，身如絕煙。芳霏一逝，美懋徒鐫。

宋光祿大夫孫賈墓銘

川祗効鏡，岳祥獻明。碧葉獨秀，瑤源自清。幼炳
器譽，夙耀才名。體兼遷雲，學備儒史。紫閣咸趨，
朱軒旣履。貴交慕塵，素遊企軌。騰藻上京，振彩

下國如彼綠蘭秉芬四塞歆人逕之不平歎天
路之冥默貴夫君之爲美播靈均與正則

齊御史中丞孫詵墓銘

筠以霜靄蘭以風薰深哉若人實好斯文系緒
承胄激騰驚芬才基魏粲學參漢雲覽志上載
洽鏡前聞騰名冠俗揚采絕群方騁明世式贊
睿君如何不淑天道難分敢雕窆石永晰幽墳
齊司徒右長史檀超墓銘

惟金有銑惟玉有瑤君實淵哉行爲世標高志

洒落逸氣寂寥奧學內溢深文外昭嘉禾籍譽
登國振朝亦既有美筠傷蕙凋人邇運曠世促
道遼永矣仁矣流芳無澆

行狀

建平王太妃周氏行狀

竊聞侯服之譽。非黃冠能敷。玉食之門。甯皂衣
所述。諒畏褻虛美於君后。被空名於鼎貴。然有
漢臣誅行。晉史書德者。亦云實而已焉。伏見國
太妃稟靈惟岳。集慶自遠。世擅淮汝。族冠疇代。
故以載曜聲書。式炳滕牒矣。太妃誕異離之正
和。函雲露之中氣。凝采韶歲。賁章并年。若廼彤
管女圖之學。纂組綺縞之工。升降處謙之儀。柔

靜居順之節莫不申道若性不嚴而成故譽滿
闡闕聲聞軒殿以元嘉某年歸於故司徒宣簡
王旣而第高恒倫秩踰外品青軒華轂用光國
輝素壁丹墀實隆家貴具惟姻娣靡不式瞻而
居尊以簡訓卑以弘躬謹蘭閨身撫椒策若衛
娥之炯行樊羸之英操方之蔑如也大明二年
宣簡王薨太妃藉悲用禮撫孤用慈柔懿之德
愈彰肅敬之問日被雖文伯之母言不踰闕苕
相之主行存乎勤無以過也大明某年拜建平

王太妃是時今王春秋方富德業未隆藉茲金
饗終能玉播故綺襦出宰弱冠升朝者亦太妃
劬勞之訓也謂天蓋高降年不永以太豫元年
二月三日薨于荊州之內寢凡厥遠邇以哀以
歎今祖行有期泉窆無遠素旂望路綵旌思歸
所以垂宣徽容髣髴金石者謹詳牒行狀具以
申言

江醴陵集

卷二

三

文

蕭太傅東耕祝文

敬祝先穡曰。攝提方春。黍稷未華。灼爍發雲。昭
耀開霞。地煦景曖。山艷水波。側聞農政。實惟民
天。兢秬獻歲。務畎上年。有渰疏潤。與雨導泉。崇
耕廵索。均逸共勞。命彼倌人。稅于青臯。羽旗銜
旄。雄戟耀毫。呈典緇耦。獻禮翠壇。宜民宜稼。克
降祈年。願靈之降。解珮停鑾。神之行兮。氣爲輶。
神之坐兮。煙爲蓋。使嘉穀與玄鬯。永爭光而無

沫哉。

蕭驃騎祭石頭戰亡文

咸告忠貞之魂曰。義爲行首。雄實士節。嗟爾驍
驚。稟才蹈烈。守玉不渝。懷冰可折。氣彰靡旗。情
皦亂轍。高墉摧堅。巨醜挫銳。深痛克矜。冤靈及
雪。隆恩殊悼。臨爾以歆。千秋同盡。百齡一世。竟
而有知。咸無遠邇。嗚呼哀哉。

騷

遂古篇

僕嘗爲造化篇、以學古制、今觸類而廣之、復有此文、兼象天問、以遊思云爾、

聞之遂古、大火然兮、水亦溟溟、無涯邊兮、女媧煉石、補蒼天兮、共工所觸、不周山兮、河洛交戰、甯深淵兮、黃炎共鬪、涿鹿川兮、女媧九子爲氏、先兮、蚩尤鑄兵、幾千年兮、十日並出、堯之間兮、羿廼斃日、事豈然兮、嫦娥奔月、誰所傳兮、豐隆

騎雲爲靈仙兮夏開乘龍何因緣兮傳說託星
安得宣兮夸父鄧林義亦艱兮建木千里烏易
論兮穆王周流往復旋兮河宗王母可與言兮
青鳥所解路誠亶兮五色玉石出西偏兮崑崙
之墟海此間兮去彼宗周萬二千兮山經古書
亂編篇兮郭釋有兩未精堅兮上有剛氣道家
言兮日月五星皆虛懸兮倒景去地出雲煙兮
九地之下如有天兮土伯九約甯若先兮西方
蓐收司金門兮北極禺強爲常存兮帝之二女

遊湘沅兮。霄明燭光。向焜煌兮。太一司命。鬼之
元兮。山鬼國殤。爲遊魂兮。迦維羅衛。道最尊兮。
黃金之身。誰能原兮。恒星不見。頗可論兮。其說
彬彬。多聖言兮。六合之內。心常渾兮。幽明詭性。
令智惛兮。河圖洛書。爲信然兮。孔甲豢龍。古共
傳兮。禹時防風。處隅山兮。春秋長狄。生何邊兮。
臨洮所見。又何緣兮。蓬萊之水。淺於前兮。東海
之波。爲桑田兮。山崩邑淪。甯幾千兮。石生土長。
必積年兮。漢鑿昆明。灰炭全兮。魏開濟渠。螺蚌

堅兮白日再中誰使然兮北斗不見藏何間兮
建章鳳闕神光連兮未央鐘簴生華鮮兮銅爲
兵器秦之前兮丈夫衣綵六國先兮周時女子
出世間兮班君絲履遊泰山兮人鬼之際有隱
淪兮四海之外孰方圓兮沃沮肅慎東北邊兮
長臂兩面赤乘船兮東南倭國皆文身兮其外
黑齒次裸民兮侏儒三尺並爲鄰兮西北丁零
又烏孫兮車師月支種類繁兮馬蹄之國善騰
奔兮西南烏弋及罽賓兮天竺于闐皆胡人兮

條支安息西海濬兮人迹所極至大秦兮珊瑚
明珠銅金銀兮琉璃瑪瑙來雜陳兮碑礫水精
莫非真兮雄黃雌石出山垠兮青白蓮華被水
濱兮宮殿樓觀並七珍兮窮陸溟海又有民兮
長股深目豈君臣兮丈夫女子及三身兮結胸
反舌一臂人兮跂踵交脛與羽民兮不死之國
皆何因兮茫茫造化理難循兮聖者不測况庸
倫兮筆墨之暇爲此文兮薄暮雷電聊以忘憂
又示君兮

雜詞 有序

予上國不才黜爲閩山長吏待罪三載究識煙霞之狀旣對道書官又無職筆墨之勢聊爲後文

構象臺

曰上妙兮道之精道之精兮俗爲名名可宗兮聖風立立聖風兮茲敎生寫經記兮寄圖剎畫影象兮在丹青起淨法兮出西海流梵音兮至東溟綱紫宙兮洽萬品冠璇寓兮濟群生余汨

阻兮至南國、迹已徂兮心未扃、立孤臺兮山岫、
架半室兮江汜、累青杉於澗構、積紅石於林樾、
雲八重兮七色、山十影兮九形、金燈兮江籬、環
軒兮匝池、相思兮豫章、戴雪兮抱霜、栽異木而
同秀、種雜草而一香、苔癰生兮繞石戶、蓮花舒
兮繡池梁、伊日月之寂寂、無人音與馬迹、耽禪
情於雲逕、守息心於端石、永結意於鷺山、長懽
悴而不惜、

訪道經

百學兮異文、錦派兮綺分、珍君之言兮、皦無際、
悅子之道兮、迥不羣、澹深韻於白水、儼高意於
浮雲、軌賢豪於後學、軼望識於前文、茲道兮可
傳、可傳兮皓然、挾茲心兮、赴絕國、懷此書兮、坐
空山、空山隱轡兮、窮翠寧、水散漫兮、涵素壑、海
外陰兮、氣曇曇、江上月兮、光灼灼、東南出兮、不
一山、西北來兮、乃雙鶴、池中蓮兮、十色紅、窗前
樹兮、萬葉落、四壁深兮、乃沈寥、左右虛兮、如寂
寞、寂寞兮、山室、德經兮、道表、盪魂兮、刷氣、掩憂

兮靜疾信若人兮先覺聊與子兮如一

鏡論語

巡青史之殘誥覽朱管之遺冊惟魯濱之一叟
信銜道而探寂世艱險而多阻君英明而不革
講業兮齊衛論精兮洙泗子之說兮義已秘成
賈鄭之雄理考黃何之壯思惜古人之取木瞰
青雲而靖意意惆悵兮有端才嶒嶸兮可觀憲
矯禹而析法襲仁誼而求安不嬾婉於戚施甯
蹉跎於馬蘭俾後生之庶士鑒明德之音翰惟

山中今寂寞沉憂思今無從石紅青今百疊山
濃淡兮萬重日下兮月出兮銅峰竹色兮
拂戶水氣兮繞窗味哲人之遺珍折片句兮忘
老嘉石門之埋名憐柳子之航道書吳伯於衣
袖鏤顏子於心抱籌出處之叔仲酌言默之多
少若妙行與上靈非積學之所紹至游夏以升
降幸砥心而勿天

悅曲池

北山兮黛栢南江兮潁石潁峰兮若虹黛樹兮

如畫暮雲兮十里朝霞兮千尺千尺兮緜緜青
氣兮往旋桐之葉兮蔽日桂之枝兮刺天百谷
多兮瀉亂波雜礪饒兮驚叢泉竟長洲兮匝東
島縈曲與兮繞西山山巒岼兮水環合水環合
兮石重沓林中電兮雨冥冥江上風兮木颯颯
盟清冷兮適潺湲白雲起兮弔石蓮客子思兮
心斷絕心斷絕兮愁無閑步東池兮夜未艾卧
西窗兮月向山引一息於魂內擾百緒於眼前
意春蘭與秋若願不絕於江邊

愛遠山

伯鸞兮已遠、名山兮不返、逮紺草之可結、及朱
華之未晚、縹余馬於椒阿、漾余舟於沙衍、臨星
朏兮樹闇、看日爍兮霞淺、淺霞兮駁雲、一合兮
一分、映壑兮爲飾、綴澗兮成文、碧色兮婉轉、丹
秀兮葢莖、深林寂以窈窕、上猿狖之所羣、羣猿
兮聒山、大林兮蔽天、楓岫兮筠嶺、蘭畹兮芝田、
紫蒲兮光水、紅荷兮艷泉、香枝兮嫩葉、翡翠兮
翠疊、非郢路之遼遠、實寸憂之相接、歆美人於

心底願山與川之可涉若溘死於汙潭哀時命而自愜

應謝主簿騷體

山櫺靜兮悲凝涼澗軒掩兮酒涵霜層風激兮
綠蘋斷積石閉兮紫苔傷芝原寂少色筠庭黯
無光沐予冠於極浦馳予珮兮江陽弔秋冬之
已暮憂與憂兮不忘使杜蘅可翦而棄夫何貴
于芬芳

劉僕射東山集學騷

含秋一顧眇然山中檀欒循石便娟來風木瑟
瑟兮氣益益石茭茭兮水成文擿江崖之素草
窺海岫之青雲願芙蓉兮未晦遵江波兮待君

山中楚辭五首

青春素景兮白日出之藹藹吾將弭節於江夏
見杜若之始大結琬麟以成車懸雜羽而爲蓋
草色綠而馬聲悲歛汭袖以流帶

子將禮於太一乃雄劍兮玉鉤日華粲於芳閣
月金披於翠樓舞燕趙之上色激河淇之名謳

薦西海之異品，傾東岳之庶羞。乘文魚兮錦質，
要靈人兮中洲。

人橘浦兮容與，心慙惘兮迷所識。視煙霞如一
色，深秋窈以虧天。上列星之所極，桂之生兮山
之巒。紛可愛兮柯團團，谿崎嶇兮石架阻。颺颺
颺兮木道寒，煙色閉兮喬木橈。嵐氣闇兮幽篁
難，忌蟪蛄之蚤吟，惜王孫之晚還。信於邑兮白
露，方天病兮秋蘭。

石筵筵兮蔽泉，雪疊疊兮薄樹。車蕭條兮山逼

舟容與兮水路。愍晨夜之摧挫。感春秋之欲暮。
征夫輟而在傍。御者跼而載顧。

魂兮歸來。異方不可以親。蝮蛇九首。雄虺戴鱗。
炎亢一光。骨爛魂傷。玄狐曳尾。赤象爲梁。至日
歸來。無徃此異左。

樂府

銅爵妓

武皇去金閣。英威長寂寞。雄劍頓無光。雜佩亦
銷鑠。秋至明月圓。風傷白露落。清夜何湛湛。孤
燭映蘭幕。撫影愴無從。惟懷憂不薄。瑤色行應
罷。紅芳幾爲樂。徒登歌舞臺。終成螻蟻郭。

採菱曲

秋日心容與。涉水望碧蓮。紫菱亦可採。試以緩
愁年。參差萬葉下。泛漾百流前。高彩隘通壑。香

氛麗廣川歌出櫂

一作趙

女曲儻入江南絃乘黿

非逐俗駕鯉乃懷仙衆美信如此無恨在

一作出

清泉

齊籍田樂歌二首

永明四年籍田
詔江淹造歌

迎送神升歌

羽鑾從動金駕時遊教騰義鏡樂綴前修率先
丹藕躬遵綠疇靈之聖之歲殷澤柔

饗神歌

瓊盄旣飾繡簋以陳方爕嘉種永毓宵民

牲出入歌

祝詳史具禮備樂薦有牲在陳有鼓在懸騰燭
象星奔水類電郊燎夙戒馱彼乘駟以伺質明
以伫神晏

薦豆呈毛血歌辭

時恭時祀有物有則伊我上聖實抱明德犧象
交陳鬱尊四塞黍惟嘉穀酒惟玄默薦通蒼祇
慶覃黎黑願靈之降祚家祐國

奏宣列之樂歌舞

殷崇配天，周尊明祀，瑞合汾陰，慶同泰峙，青幕
雲舒，丹殿霞起，二曜惟新，五精告始，于以享之
景福是履。

齊鳳皇銜書伎辭

宋世有此辭，齊初
詔中書郎江淹改。

皇齊啓運，從瑤璣靈鳳，銜書集紫微，和樂旣洽，
神所依，超商卷夏，耀英輝，永世壽昌，聲華飛。

詩

侍始安王石頭

緒官承盛世，逢恩侍英王。結劒從深景，撫袖逐
曾光。暮情鬱無已，流望在川陽。平原忽超遠，參
差見南湘。何如塞北陰，雲鴻盡來翔。擘鏡照愁
色，徒坐隱憂方。山中如未久，無使桂葉傷。

從征虜始安王道中

乘笏從帷幕，仄身豫休明。君子未獲宴，小人亦
自營。結軒首涼野，驅馬徠寒城。容裔還鄉權，逶

迤去國旌山氣亘百里山色與雲平喬松日夜
竦紅霞旦夕生徒慙恩原槩空抱春施名仰願
光威遠歲晏返柴荆

從冠軍建平王登廬山香爐峰

廣成愛神鼎淮南好丹經此山具鸞鶴往來盡
仙靈瑤草正翕施玉樹信蔥青絳氣下紫薄白
雲上杳冥中坐瞰蜿蜒虹俛仕視流星不尋遐恠
極則知耳目驚日落長沙渚曾陰萬里生籍蘭
素多意臨風默含情方學松栢隱差逐市井名

幸承光誦末，伏思託後旌。

從建平王遊紀南城

恭承此嘉惠，末官至南荆。歛衽依光采，瑞笏奉
仁明。再逢綠草合，重見翠雲生。江甸知禮富，漢
渚聞教清。君王澹以思，樹羽望楚城。年積衣劍
滅，地遠宮館平。錦帳終寂寞，綵瑟秘音英。丹沙
信難學，黃金不可成。遷化每如茲，安用貴空名。
流巖慘中懷，凝意方自驚。願借若木景，長照憂
人情。

望荆山

奉義至江漢。始知楚塞長。南關繞桐栢。西嶽出
魯陽。寒郊無留影。秋日懸清光。悲風撓重林。雲
霞肅川漲。歲晏君如何。零淚霑衣裳。玉柱空掩
露。金尊坐含霜。一聞苦寒奏。再便豔歌傷。

步桐臺

客子畏霜雪。憂至竟悠哉。綺帷生網羅。寶刀積
塵埃。思君出漢北。鞍馬登楚臺。歲綵合雲光。平
原秋色來。寂聽積空意。凝望信長懷。蕙芬自有

美光景詎徘徊山中忽緩駕暮雪將盈階

秋至懷歸

悵然集漢北還望岨山田汙汙百重壑參差萬
里山楚關帶秦隴荆雲冠吳烟草色歛窮水木
葉變吳川秋至帝子降客人傷嬋娟試訪淮海
使歸路成數千蓬驅未止極旌心徒自懸若華
想無慰憂至定傷年

渡西塞望江上諸山

南國多異山襍樹共冬榮潺湲夕澗急嘈嘈晨

鷗鳴石林上參錯流沫下縱橫松氣鑑青藹霞
光鑠丹英望古一凝思留滯桂枝情結友愛遠
岳採藥好長生當畏佳人晚秋蘭傷紫莖海外
果可學歲暮誦仙經

赤亭渚

吳江泛邱墟饒桂復多楓水夕潮波黑日暮精
氣紅路長寒光盡鳥鳴草木窮瑤水雖未合珠
霜竊過中坐識物序晏臥視歲陰空一傷千里
極獨望淮海風遠心何所類雲邊有征鴻

渡泉嶠出諸山之頂

岑峯蔽日月，左右信艱哉。萬壑共馳驚，百谷爭
往來。鷹隼旣厲翼，蛟魚亦曝鰓。崩壁迭枕臥，嶄
石屢盤迴。伏波未能鑿，樓船不敢開。百年積流
水，千歲生青苔。行行詎半景，余馬以長懷。南方
天炎火，魂兮可歸來。

僊陽亭

曄淚訪亭候，茲地乃閩城。萬古通漢使，千載連
吳兵。瑤磻復嶄卒，銅山鬱縱橫。方水埋金艘，圓

岸伏丹瓊，下視雄虹。照俯看綵霞明，桂枝空命。
折烟氣，坐自驚。劒逕差前檢。岷山慙舊名。伊我
從霜露，僕御復孤征。楚客心命絕，一願聞越聲。

遊黃蘗山

長望竟何極，閭雲連越邊。南州饒竒怪，赤縣多
靈仙。金峰各虧日，銅石共臨天。陽岫照鸞采，陰
谿噴龍泉。殘杙千代木，唐岑萬古烟。禽鳴丹壁
上，猿嘯青崖間。秦皇慕隱淪，漢武願長年。皆負
雄豪威，棄劒爲名山。况我葵藿志，松木橫眼前。

所若同遠好。臨風載悠然。

還故園

漢臣泣長沙。楚客悲辰陽。古今雖不舉。茲理亦
宣傷。山中信寂寥。孤景吟空堂。北地三變露。南
簷再逢霜。竊值寰海闢。仄見圭綈昌。浮雲抱山
川。遊子御故鄉。遽發桃花渚。適宿春風塲。紅草
涵電色。綠樹鑠烟光。高歌僊關國。微歎依笙簧。
請學碧靈草。終歲自芬芳。

劉僕射東山集

蕭蕭雲色滋，惟愛起長思。
喬木嘯山曲，征鳥怨水湄。
共惜玉樽暮，願是舊集作使光陰遲。
紳裳視絕雲，銜意方此時。
誦飾江臯駕，終從海濱詩。

陸東海譙山集

杳杳長役思，思來使懷濃。
恒忌光氛度，藉蕙望春紅。
青莎被海月，朱華冒水松。
輕風暖長嶽，雄虹赫遠峰。
日暮崦嵫谷，參差綵雲重。
永願白沙渚，遊行遂相從。
丹山有琴瑟，不爲憂傷容。

無錫縣歷山集

秋生白露日。思起秋風年。竊悲杜蘅暮。寧涕弔
空山。落葉下楚水。別鶴噪吳田。嵐氣陰不極。日
色半虧天。酒至情蕭瑟。憑樽還惘然。一聞清琴
奏。歔泣方留連。況乃客子念。直置絳竹間。

外兵舅夜集

丹林一葉舊。碧草從此空。烟光拂夜色。華舟盪
秋風。歛意悵何已。極望情思中。瑤瀾寂以晏。若
采能幾終。暮心亦誰寄。江臯桂有叢。

貽袁常侍

昔我別楚水，秋月麗秋天。今君客吳坂，春色縹

一作日媚

春泉。幽冀生碧草，沅湘含翠烟。鑠鑠霞上

景，懔懔雲外山。涉江竟何望，留滯空採蓮。駐情
光氣下凝愁，琴瑟前珠貝。性明潤蘭玉，好芳堅
不以宿昔咀，懷愧期暮年。

古意報袁功曹

從軍出隴北，長望陰山雲。涇渭各異流，恩情於
此分。故人贈寶劒，鏤以瑤華文。一言鳳獨立，再
說鸞無群。何得晨風起，悠哉凌翠氛。黃鵠去千

里垂涕爲報君

寄丘三公

昔我學冠劍逢君在三川何意風雨激一訣異
東西。先叶菊秀空應奪蘭芳幾時堅常恐握手畢
黯如光絕天安得明月珠擘涕寄吳山

卧疾怨別劉長史

四時煎日夜玉露催紫榮始懷未及歎春意秋
方驚涼草散螢色衰樹歛蟬聲馮景魂且謚臥
堂怨已生承君客江潭先愁鴻雁鳴吳山饒離

袂楚水多別情，金堅碧不滅。桂華蘭有英，無輟
代上朝。豈惜鏡中明，但見一葉落。哀恨方未平，

燈夜和殷長史

冬盡綵葉暮，金石亦懷傷。冰鱗不能起，水鳥望
川梁。客子仿永夜，寂寞幽意長。臥歇丹丘采，坐
失曾泉光。結眉慘成慮，銷憂非羽觴。此心異可
緩，清芷在沅湘。

贈鍊丹法和殷長史

琴高遊會稽，靈變竟不還。不還有長意，長意希

童顏身識本爛熳，光曜不可攀。方驗參同契，金
竈鍊神丹。頓捨心知愛，永卻平生歡。玉牒裁可
卷，珠藥不盈簞。譬如明月色，流采映歲寒。一待
黃冶就，青芬遲孤鸞。

從蕭驃騎新帝壘

鯢妖毀王度，虹氣咀王猷。上宰軫靈略，宏威肅
廣謀。鯨嶮冒戈堞，乘嶠架烽樓。燕兵歌越水，代
馬思吳州。金筵夜一遠，明月信悠悠。雲色被江
出，烟光帶海浮。開襟夾蒼宇，拓遠局溟洲。折日

承丹谷總駕臨青邱。仄待颺霧晏。方從畎壑遊。

惜晚春應劉秘書

烟景抱空意。蘅杜綴幽心。心憂望碧葉。涵影顧
青林。風光多樹色。露華翻蕙陰。水苔方下蔓。石
蘿日上尋。霞衣已具帶。仙冠不待簪。徒爲多委
鬱。精魄還自臨。始獲瓊歌贈。一點重如金。山中
有蘼桂。玉瀝乃共斟。

秋夕納涼奉和刑獄舅

蕭條晚秋景。旻雲承景斜。虛堂起青靄。崦嵫生

暮霞空居寂以歛、左右自幽歌、騎星謝箕尾、濯
髮慙陽阿、年歇立圃壁、歲滅天津波、金簫哀夜
長、瑤琴怨暮多、四時通信黯、春風日夜過、楚水
徒有蘭、憂至竟如何、

郊外望秋答殷博士

白露掩江臯、青蒲平地蕪、長夜亦何際、銜思久
踟躕、企余重蘭貝、清才富金踰、獨豔始東山、擅
麗終西都、雲精無永滯、水碧豈暫濡、屬我嶷景
半、賞爾若光初、折麻異離羣、紉蕙非索居、頻贈

既雅歌還懷諒知書

冬盡難離和邱長史

間居深悵悵颼寒拂中閨寶禮自千里
縑書果君題山川吐幽氣雲景抱長懷
茲別亦爲遠潮瀾鬱東西汀臯日慘色
桂閨猿方啼擘意誰侘條屑涕在心垂
杜蘅念無沫石蘭終不睽異總歲暮駕
遊行蒼山蹊

池上酬劉記室

戚戚憂可結結憂視春暮紫荷漸曲池
臯蘭覆

徑路蔥蒨，亘華堂。葢葢雜綺樹，爲此久伫立。容
易光陰度，水館次文羽。山葉下暝露，懷賞入舊
襟。悅物覽新賦，惜我無雕文。報章慙復素。

吳中禮石佛

幻生太浮詭，長思多沈疑。疑思不慙炤，詭生甯
盡時。敬承積劫下，金光鑠海湄。火宅歛焚炭，藥
草匝卉滋。常願樂此道，誦經空山坻。禪心暮不
雜，寂行好無私。軒騎久已訣，親愛不留遲。憂傷
漫漫情，靈意終不淄。誓尋青蓮果，永人梵庭期。

採石上菖蒲

瑤琴久蕪沒。金鏡廢不看。不見空閨裏。縱橫愁
思端。緩步遵汀渚。揚柂泛春瀾。電至烟流綺。水
綠桂涵丹。憑酒竟一作意未悅。半景方自歎。每爲
憂見及。杜若豈能寬。冀採石上草。得以駐餘顏。
赤鯉儻可乘。雲霧不復還。

禱體三十首

有序

夫楚謠漢風。既非一骨。魏製晉造。固亦二體。譬
猶藍朱成彩。雜錯之變無窮。宮商爲音。靡曼之

態不極。故蛾眉詎同貌。而俱動於魄。芳草甯共氣。而皆悅於魂。不其然歟。至於世之諸賢。各滯所逃。莫不論甘而忌辛。好丹而非素。豈所謂通方。廣恕。好遠。兼愛者哉。乃及公幹仲宣之論。家有曲直。安仁士衡之評。人立矯抗。况復殊於此者乎。又貴遠賤近。人之常情。重耳輕目。俗之恒蔽。是以邯鄲托曲於李奇。士季假論於嗣宗。此其效也。然五言之興。諒非夙古。但關西鄴下。旣已罕同。河外江南。頗爲異法。故立黃經緯之辨。

金碧浮沈之殊。僕以爲亦各具

選作合其

美兼善而

已。今作三十首詩。數其文體。雖不足品藻淵流。庶亦無乖商確云爾。

古離別

遠與君別者。乃至鴈門關。黃雲蔽千里。遊子何時還。送君如昨日。簷前露已團。不惜蕙草晚。所悲道里寒。君在天一涯。妾身長別離。願一見顏。色不異瓊樹枝。免絲及水萍。所寄終不移。

李都尉陵從軍

樽酒送征人，踟躕在親宴。日暮浮雲滋，握手淚
如霰。悠悠清川水，嘉魴得所薦。而我在萬里，結
友一作髮不相見。袖中有短書，願寄雙飛燕。

班婕妤詠扇

紈扇如團月，出自機中素。畫作秦王女，乘鸞向
烟霧。彩色世所重，雖新不代故。竊愁涼風至，吹
我玉階樹。君子恩未畢，零落在中路。

魏文帝曹丕遊宴

置酒坐飛閣，逍遙臨華池。神飈自遠至，左右笑

蓉披綠竹夾清水，秋蘭被幽崖。月出照園中，冠珮相追隨。客從南楚來，爲我吹參差。淵魚猶伏浦，聽者未云疲。高文一何綺，小儒安足爲。蕭蕭廣殿陰，雀聲愁北林。衆賓還城邑，何用慰我心。

陳思王曹植贈友

君王禮英賢，不吝千金璧。雙闕指馳道，朱宮羅第宅。從容氷井臺，清池映華薄。涼風盪芳氣，碧樹先秋落。朝與佳人期，日夕望青閣。褰裳摘明珠，徙倚拾蕙若。眷我二三子，辭義麗金腹。延陵

輕寶劒季布重然諾處富不忘貧有道在葵藿
劉文學楨感遇

蒼蒼山中桂團團霜露色霜露一何緊桂枝生
自直橘柚在南國因君爲羽翼謬蒙聖主私託
身文墨職丹彩旣已過敢不自雕飾華月照芳
池列坐金殿側微臣固受賜鴻恩良未測

王侍中絜懷德

伊昔值世亂秣馬辭帝京旣傷蔓草別方知秋
杜情峭函蕩選作邱墟冀闕緬縱橫倚棹泛涇

渭日暮山河清。蟋蟀依素

選作

野。嚴風吹枯莖。

鸛鷀在幽草。客子淚已零。去鄉三十載。幸遭天下平。賢王降嘉賞。金貂服玄纓。侍宴出河曲。飛蓋遊鄴城。朝露竟幾何。忽如水上萍。君子篤恩義。柯葉終不傾。福履既所綏。千載垂令名。

稽中散康言志

曰余不師訓。潛志去世塵。遠想出宏域。高步超常倫。靈鳳振羽儀。戢景西海濱。朝食琅玕實。夕飲玉池津。處順故無累。養德乃入神。曠哉宇宙

惠雲羅更四陳，哲人貴識義。大雅明庇身，莊生
悟無爲。老氏守其真，天下皆得一名實。久相賓
咸池，饗爰居。鐘鼓或愁辛，柳惠善直道。孫登庶
知人，寫懷良未遠。感贈以書紳。

阮步兵籍詠懷

青鳥海上遊，鸞斯蒿下飛。浮沉不相宜，羽翼各
有歸。飄飄可終極，沆瀣安是非。朝雲乘變化，光
耀世所希。精衛銜木石，誰能測幽微。

張司空華離情

江酉陽集 卷二
秋月映簾櫳，懸光入丹墀。佳人撫鳴琴，清夜守
空帷。蘭徑少行迹，玉臺生網絲。庭樹發紅彩，閨
草含碧滋。延伫整綾綺，萬里贈所思。願垂湛露
惠，信我皎日期。

潘黃門岳述哀

青春速天機，素秋馳白日。美人歸重泉，悽愴無
終畢。殯宮已肅清，松柏轉蕭瑟。俯仰未能弭，尋
念非但一。撫衿悼寂寞，恍然若有失。明月入綺
窓，髣髴想蕙質。銷憂非萱草，永懷寄夢寐。夢寐

復冥冥何由覲爾形我慙北海術爾無帝女靈
駕言出遠山徘徊泣松銘雨絕無還雲華落豈
留英日月方代序寢興何時平

陸平原機羈宦

諸后降嘉命恩紀被微身明發眷桑梓永歎懷
密親流念辭南瀛銜怨別西津驅馬連淮泗旦
夕見梁陳服義追上列矯迹厠宮臣朱黻咸髦
士長纓皆俊民契澗承華內綢繆踰歲年日暮
聊總駕逍遙觀洛川殂殁選作徂役多拱木宿草凌

寒烟遊子易感慨、躑躅還自憐、願言寄三鳥、離思非徒然

左記室思詠史

韓公淪賣藥、梅生隱市門。百年信荏苒、何用苦心魂。當學衛霍將、建功在河源。珪組賢君賤、青紫明主恩。終軍才始達、賈誼位方尊。金張服貂冕、許史乘華軒。王侯貴片議、公卿重一言。太平多歡娛、飛蓋東都門。顧念張仲蔚、蓬蒿滿中園。

張黃門協苦雨

丹霞蔽陽景，綠泉涌陰渚。水鶴巢層甍，山雲潤
柱礎。有弁興春節，愁霖貫秋序。熒熒涼葉奪，戾
戾颶風舉。高談翫四時，索居慕儔侶。青苔一作苔
日夜黃，芳蕤成宿楚。歲暮百慮交，無以慰延佇。

劉太尉琨傷亂

皇晉遘陽九，天下橫氛霧。秦趙值薄蝕，幽并逢
虎據。伊余荷寵靈，感激狗馳驚。雖無六奇術，冀
與張韓遇。寧戚扣角歌，桓公遭乃舉。苟息冒險
難，實以忠貞故。空令日月逝，愧無古人度。飲馬

出城濠北望沙漠路千里何蕭條白日隱寒樹
投袂旣憤懣撫枕懷百慮功名惜未立玄髮已
改素時哉苟有會治亂惟冥數

盧郎中謚感交

大厦須異材廊廟非庸器英俊著世功多士濟
斯位眷顧成綢繆乃與時髦匹姻媾久不虧契
濶豈但一逢厄旣已同處危非所恤常慕先達
衆觀古論得失馬服爲趙將疆場得清謚信陵
佩魏印秦兵不敢出慨無握中策徒慙素絲質

羈旅去舊京。感遇踰琴瑟。自顧非杞梓。勉力在
無逸。更以畏友朋。濫吹垂名實。

郭弘農璞遊仙

崦山多靈草。海濱饒竒石。偃蹇尋青雲。隱淪駐
精魄。道人讀丹經。方士鍊玉液。朱霞入窓牖。曜
靈照空隙。傲睨摘木芝。陵波採水碧。眇然萬里
遊。矯掌望烟客。永得安期術。豈愁濛汜迫。

孫廷尉綽禰述

太素旣已分。吹萬著形兆。寂動苟有源。因謂殤

予天道喪涉千載。津梁誰能了。思乘扶搖翰。卓然凌風矯。靜觀尺極義。理足未嘗少。問問秋月明。憑軒詠堯老。浪迹無蚩妍。然後君子道。領畧歸一致。南山有綺皓。交臂久變化。傳火乃薪草。亶亶玄思清。胷中去機巧。物我俱忘懷。可以狎鷗鳥。

許徵君詢自叙

張子闇內機。單生蔽外像。一時排冥筌。泠然空中賞。遣此弱喪情。資神任獨往。采藥白雲隈。聊

以肆所養。丹葩曜芳蕤，綠竹陰閒敞。茗茗寄意
勝不覺，凌虛上。曲櫺激鮮飈，石室有幽響。去矣
從所欲，得失非外獎。至哉操斤客，重明固已朗。
五難旣灑落，超迹絕塵網。

殷東陽仲文興矚

晨遊任所萃，悠悠蘊真趣。雲天亦遼亮，時與賞
心遇。青松挺秀萼，惠色出喬樹。極眺清波深，緬
映石壁素。瑩情無餘滓，拂衣釋塵務。求仁旣自
我，玄風豈外慕。直置忘所宰，蕭散得遺慮。

謝僕射混遊覽

信矣勞物化、憂襟未能整、薄言遵郊衢、總轡出
臺省、淒淒節序高、寥寥心悟永、時菊耀巖阿、雲
霞冠秋嶺、眷然惜良辰、徘徊踐落景、卷舒雖萬
緒、動復歸有靜、曾是迫桑榆、歲暮從所秉、舟壑
不可攀、忘懷寄匠郢、

陶徵君潛田居

種苗在東臯、苗生滿阡陌、雖有荷鋤倦、濁酒聊
自適、日暮巾柴車、路闇光已夕、歸人望烟火、稚

子侯簷隙問君亦何爲百年會有役但願桑麻
成蠶月得紡績素心正如此開逕望三益

謝臨川靈運遊山

江海經邅迴山嶠備盈缺靈境信淹留賞心非
徒設平明登雲峰杳與廬霍絕碧障長周流金
潭恒澄徹洞林帶晨霞石壁映初晰乳竇旣滴
瀝丹井復寥泝崑崙轉奇秀岑峯還相蔽赤玉
隱瑤溪雲錦被沙汭夜聞猩猩啼朝見鼯鼠逝
南中氣候暖朱華凌白雪幸遊建德鄉觀奇經

禹穴身名竟誰辨、圖史終磨滅、且泛桂水潮、映月遊海滢、攝生貴處順、將爲智者說、

顏特進延之侍宴

太微凝帝宇、瑤光正神縣、揆日粲書史、相都麗聞見、列漢構仙宮、開天製寶殿、桂棟留夏飈、蘭橈停冬霰、青林結冥濛、丹巘被

五臣作披

蔥蒨、山雲

備卿霑、池卉具靈變、重陽集清氛、下輦降玄宴、驚望分寰遂、矚曠盡都甸、氣生川嶽陰、烟滅淮海見、中坐溢朱組、步櫚筵瓊弁、禮登仁睿情、樂

關延皇昞測恩躋愉逸、
汭牒情浮賤承榮重兼

金

李善作榮重餽兼金

巡華過盈瑱敢飾與人詠方慙淥

水薦

謝法曹惠連贈別

昨發赤亭渚今宿浦陽汭方作雲峰異豈伊千

里別芳塵未歇席零

李善作零

淚猶在袂

入聲

停艫望

極浦弭棹阻風雪風雪既經時夜永起懷思汎

濫北湖遊茗

李善作茗

亭南樓期點翰詠新賞開泰

瑩所疑摘芳愛氣馥拾藥憐色滋色滋畏沃若

人事亦銷鑠，子衿怨勿往。谷風誚輕薄，共乘延
州信。無慙仲路諾，靈芝望三秀。孤筠情所託，所
託已殷勤。祇足攪懷人，今行嘔嶮外。銜思至海
濱，覲子杳未偁。欸睇在何辰，雜珮雖可贈。疏華
竟無陳，無陳心惛勞。旅人豈遊遨，幸及風雪霽。
青春滿江臯，解纜候前侶。還望方鬱陶，烟景若
離遠。未響寄瓊瑤。

王徵君微養疾

窈靄瀟湘空，翠澗澹無滋。寂歷百草晦，歔吸鶡

雞悲清陰往來遠。月華散前墀。鍊藥矚虛幌。汎
瑟臥遙帷。水碧驗未黠。金膏靈詎淄。北渚有帝
子。蕩瀟不可期。悵然山中暮。懷痾屬此詩。

袁太尉淑從駕

宮廟禮哀敬。粉邑道嚴立。恭潔由明祀。肅駕在
祈年。詔徒登季月。戒鳳藻行川。雲旆象漢徙宸
網。擬星懸朱櫨。麗寒渚。金鏐映秋山。羽衛藹流
景。綵吹震沈淵。辨詩測京國。履籍鑒都鄠。昨謠
響玉律。邑頌被丹絃。文軫薄桂海。聲教燭冰天。

江酉陽集 卷二
和惠頒上笏恩渥浹下筵幸侍觀洛後豈慕巡
河前服義方無沫展歌殊未宣

謝光祿莊郊遊

肅舫出郊際徙樂逗江陰翠山方藹藹青浦正
沈沈涼葉照沙嶼秋榮冒水潯風散松架險雲
鬱石道深靜默鏡縣野四睇亂層岑氣清知鴈
引露華識猿音雲裝信解黻烟駕可辭金始整
丹泉術終覲紫芳心行光自容裔無使弱思侵

鮑參軍昭戎行

豪士枉尺璧，宵人重恩光。徇義非爲利，執羈輕
去鄉。孟冬郊祀月，殺氣起嚴霜。戎馬粟不煖，軍
士冰爲漿。晨上城皐坂，磧礫皆羊腸。寒陰籠白
日，大谷晦蒼蒼。息徒稅征駕，倚劒臨八荒。鷙鵬
不能飛，玄武伏川梁。鍛翮由時至，感物聊自傷。
豎儒守一經，未足識行藏。

休上人怨別

西北秋風至，楚客心悠哉。日暮碧雲合，佳人殊
未來。露彩方泛艷，月華始徘徊。寶書爲君掩，瑤

瑟詎能開相思巫山渚悵望陽雲臺膏鑪絕沈
燎綺席生浮埃桂水日千里因之平生懷

學魏文帝

西北有浮雲繚繞華陰山惜哉時不遇入夜值
霜寒、秋風聒地起、吹我至幽燕、幽燕非我國、窈
窕爲誰賢、少年歌且止、歌聲斷客子、

效阮公詩十五首

歲暮懷感傷、中夕弄清琴、戾戾曙風急、團團明
月陰、孤雲出北山、宿鳥驚東林、誰謂人道廣、憂

慨自相尋甯知霜雪後獨見松竹心

十年學讀書顏華尚美好不逐世間人鬪雞東
郊道富貴如浮雲金玉不爲寶一旦鷄鳴巖
霜被勁草志氣多感失淚下沾懷抱

白露淹庭樹秋風吹羅衣忠信主不合辭意將
訴誰獨坐東軒下雞鳴夜已晞總駕命賓僕遵
路起旋歸天命誰能見人蹤信可疑

飄飄恍惚中是非安所之大道常不驗金火每
如斯恍慨少淑貌便娟多令辭宿昔秉心誓靈

明將見期願從丹邱駕長弄華池滋

陰陽不可知鬼神惟杳冥暫試武帝貌一見李
后靈同情淪異物有體入無形賢聖共草昧仁
智焉足明變化未有極恍惚誰能精

若木出海外本自丹水陰群帝共上下鸞鳥相
追尋千齡猶旦夕萬世更浮沉豈與異鄉士瑜
瑕論淺深

夏后乘兩龍高會在帝臺榮光河雒出白雲蒼
梧來侍御多賢聖升降有群才四時有變化盛

明不徘徊、高陽邈已遠、竝立誰語哉、

昔余登大梁、西南望洪河、時寒原野曠、風急霜
露多、仲冬正慘切、日月少精華、落葉縱橫起、飛
鳥時相過、搔首廣川陰、懷歸思如何、常願反初
服、間步潁水阿、

宵月輝西極、女主映東海、佳麗多異色、芬葩有
竒采、綺縞非無情、光陰命誰待、不與風雨變、長
共山川在、人道則不然、消散隨風改、

少年學擊劒、從師至幽州、燕趙兵馬地、唯見古

時邱登城望山水平原獨悠悠寒暑有往來功名安可留

擾擾當途子毀譽多埃塵朝生與馬間夕死衢路濱藜藿應見棄勢位乃爲親華屋爭結紱朱門競彈巾徒羨草木利不愛金碧身至德所以貴河上有丈人

華樹曜北林芬芳空自宣秋至白雲起蟪蛄號庭前中心有所思虛堂獨浩然安坐詠琴瑟逍遙可永年

假乘試行遊，北望高山岑。翩翩征鳥翼，蕭蕭松
栢陰。感時多辛酸，覽物更傷心。性命有定理，禍
福不可禁。唯見雲際鵠，江海自追尋。

夕雲映西山，蟋蟀吟桑梓。零露被百草，秋風吹
桃李。君子懷苦心，感慨不能止。駕言遠行遊，驅
馬清河涘。寒暑更進退，金石有終始。光色俯仰
間，英豔難久恃。

至人貴無爲，裁魂守寂寥。唯有馳騫士，風塵在
一朝。輿馬相跨躍，賓從共矜驕。天道好盈缺，春

華故秋凋、不知北山民、商歌弄塲笛、

就謝主簿宿

季月寒氣重、滋蘭錯無芳、北方漂夜色、河凝晷
如霜、悵哉心神晚、燭滅此深堂、芟衣如可贈甯
濕岨雲梁、

無錫舅相送銜涕別

心遠路已迴、意滿辭未陳、曾風漂別蓋、北雲竦
征人、杯酒憐歲暮、志氣非上春、若無孤鳥還、漚
泣何所因、

當春四韻同 左丞

雷萌山中草。雲煦江上花。流烟漾璇景。輕風泛
凌霞。我有幽蘭念。銜意矚里斜。友人殊未還。獨
慰簷前華。

感春冰遙和謝中書二首

江臯桐始華。歛衣望邊亭。平原何寂寂。島暮蘭
紫莖。芬披好草合。流爛新光生。水雪徒皦潔。此
焉空守貞。

暮意歌上眷。悵哉望佳人。擘洲之宿莽。命爲瑤。

桂因觀書術不變學古道恒真若作商山客寄
謝丹水濱

詠美人春遊

江南二月春東風轉綠蘋不知誰家子看花桃
李津白雪凝瓊貌明珠點絳唇行人咸息駕爭
擬洛川神

征怨

蕩子從征久鳳樓簫管閒獨枕凋雲鬢孤燈損
玉顏何日邊塵淨庭前征馬還

清思詩

趙后未至麗，陰妃非美極。情理儻可論，形有焉足識。帝女在河洲，晦映西海側。陰陽無定光，襟錯千萬色。終歲如瓊草，紅華長翕施。

師曠操雅操，延子聆奇音。玄鶴徒翔舞，清角自浮沉。明琯東南逝，精絲西北臨。白雲瑤池曲，止一作上使淚淫淫。

秋夜紫蘭生，湛湛明月光。偃蹇靈芝采，容裔紫華堂。林木不拂蓋，淇水甯漸裳。倏忽南江陰，照

海國集 卷二 三
曜北海陽從此長往來萬世無感傷

白露滋金瑟清風蕩玉琴空閨饒遠念虛堂生
夜陰茲夕一何衰明月沒西林世人重時暮道
士情亦深願乘青鳥翼徑出玉山岑

至德不可傳靈龜不可侶草木還根蒂精靈歸
妙理我學杳冥道誰能測窮已須待九轉成終
會長沙市

傷內弟劉常侍

金璧自蕙質蘭杜信嘉名丹綵旣騰迹華萼故

揚聲伊余方罷秀歎息向君榮誰疑春光旻何
遽秋露輕遠心惜近路促景怨長情風至衣袖
冷况復蟋蟀鳴白露泂漢沼明月空漢生長悲
離短意惻切吟空庭汪欷東郊外流涕北山垆

悼室人十首

佳人永暮矣隱憂遂歷茲寶燭夜無華金鏡晝
恒微桐葉生綠水霧天流碧滋蕙弱芳未空蘭
深鳥思時湘醺徒有酌意塞不能持

適見葉簫條已復花菴鬱帳裏春風盪簷前還

燕拂垂涕視去景，摧心向徂物。今悲輒流涕，昔
歡常飄忽。幽情一不弭，守歎誰能慰。

夏雲多禰色，紅光鑠毳鮮。苒弱屏風草，潭拖曲
池蓮。黛葉鑑深水，丹華香碧烟。臨綵方自弔，擘
氣以傷然。命知悲不絕，恒如注海泉。

駕言出遊衍，冀以滌心胷。復值烟雨散，清陰帶
山濃。素沙匝廣岸，雄虹冠尖峯。出風舞森桂，落
日暖圓松。還結生不念，楚客獨無容。

秋至擣羅紈，淚滿未能開。風光肅入戶，月華爲

誰來結眉何珠網，慙思視青苔。髮局將成葆，帶滅不須摧。我心若涵烟，益蔭滿中懷。

窓塵歲時阻，閨蕪日夜深。流黃夕不織，甯聞梭杼音。涼靄漂虛座，清香盪空琴。蜻引知寂寥，蛾飛測幽陰。乃抱生死悼，豈伊離別心。

顚顚氣薄暮，蔌蔌清衾單。階前水光裂，樹上雪花團。庭鶴哀以立，雲雞肅且寒。方東有苦淚，承夜非膏蘭。從此永黯削，萱葉焉能寬。

抒悲情雖滯，送任意所知。空座幾時設，虛帷無

久垂暮氣亦何勁，嚴風照天涯。夢寐無端際，愀
恍有分離意念。每失垂徒見，四時虧。

神女色姱麗，乃出巫山湄。逶迤羅袂下，鄣日望
所思。佳人獨不然，戶牖絕錦綦。感此增嬋娟，屑
屑涕自滋。清光澹且減，低意守空帷。

二妃麗瀟湘，一有乍一無。佳人承雲氣，無下此
幽都。當追帝女迹，出入泛靈輿。掩映金淵側，遊
豫碧山隅。曖然時將罷，臨風還故居。

本傳

江淹字文通，濟陽考城人也。少孤貧，好學沈靜，少交遊。起家南徐州從事，轉奉朝請。宋建平王景素好士，淹隨景素在南兗州。廣陵令郭彥文得罪，辭連繫淹州獄。淹獄中上書。景素覽書，卽日出之。尋舉南徐州秀才，對策上策，轉巴陵王國左常侍。景素爲荊州淹從之鎮，少帝卽位多失德。景素專據上流，咸勸因此舉事。淹每從容諫曰：「流言納禍，二叔所以同亡。抵局衡怨，七國

於○焉○俱○斃○殿○下○不○求○宗○廟○之○安○而○信○左○右○之○計○
則○復○見○麋○鹿○霜○露○棲○於○姑○蘇○之○臺○矣○景○素○不○納○
及○鎮○京○口○淹○又○爲○鎮○軍○叅○軍○事○領○南○東○海○郡○丞○
景○素○與○腹○心○日○夜○謀○議○淹○知○禍○機○將○發○乃○贈○詩○
十○五○首○以○諷○焉○會○南○東○海○太○守○陸○澄○丁○艱○淹○自○
謂○郡○丞○應○行○郡○事○景○素○用○司○馬○柳○世○隆○淹○固○求○
之○景○素○大○怒○言○於○選○部○黜○爲○建○安○吳○興○令○淹○在○
景○三○年○昇○明○初○齊○帝○輔○政○聞○其○才○召○爲○尚○書○駕○

郎驃騎叅軍俄而荊州刺史沈攸之作亂高

帝謂淹曰。天下紛紛若是。君謂何如。淹對曰。昔項強而劉弱。袁衆而曹寡。羽號令諸侯。卒受一劍之辱。紹跨躡四州。終爲奔北之虜。此謂在德不在鼎。公何疑哉。帝曰。聞此言者多矣。試爲慮之。淹曰。公雄武有奇畧。一勝也。寬容而仁恕。二勝也。賢能畢力。三勝也。民望所歸。四勝也。奉天子而伐叛逆。五勝也。彼志銳而器小。一敗也。有威而無恩。二敗也。士卒解體。三敗也。搢紳不懷。四敗也。懸兵數千里。而同惡相濟。五敗也。故雖

豺狼十萬而終爲我獲焉。帝笑曰：君談過矣。是時軍書表記皆使淹具草，相國建補記主叅軍事。建元初，又爲驃騎建安王記室，帶東武令，叅掌詔冊，并典國史。尋遷中書侍郎。永明初，遷驍騎將軍，掌國史，出爲建武將軍、廬陵內史，視事三年，還爲驍騎將軍，兼尚書左丞。尋復以本官領國子博士。少帝初，以本官兼御史中丞。時明帝作相，因謂淹曰：君昔在尚書中，非公事不妄行，在官寬猛能折衷，今爲南司，足以振肅百寮。

淹答曰。今日之事。可謂當官而行。更恐才劣。志薄。不足以仰稱明旨耳。於是彈中書令謝朓。司徒左長史王續。護軍長史庾弘遠。並以久疾不預山陵公事。又奏前益州刺史劉悛。梁州刺史陰智伯。並贓貨巨萬。輒收付廷尉治罪。臨海太守沈昭畧。永嘉太守庾曇隆。及諸郡二千石。并大縣官長。多被劾治。內外肅然。明帝謂淹曰。宋世以來。不復有嚴明中丞君。今日可謂近世獨步。明帝卽位。爲車騎臨海王長史。俄除廷尉卿。

加給事中遷冠軍長史加輔國將軍出爲宣城
太守將軍如故在郡四年還爲黃門侍郎領步
兵校尉尋爲祕書監永元中崔惠景舉兵圍京
城衣冠悉投名刺淹稱疾不往及事平世服其
先見東昏未淹以祕書監兼衛尉固辭不獲免
遂親職謂人曰此非吾任路人所知正取吾空
名耳且天時人事尋當顛覆孔子曰有文事者
必有武備臨事圖之何憂之有頃之又副領軍
王瑩及義師至新林淹微服來奔高祖拔爲冠

軍將軍、祕書監如故、尋兼司徒、左長史、中興元年遷吏部尚書、二年轉相國、右長史、冠軍將軍如故、天監元年爲散騎常侍、左衛將軍、封臨沮縣、開國伯、食邑四百戶、淹乃謂子弟曰、吾本素宦、不求富貴、今之忝竊、遂至於此、平生言止足之事、亦以備矣、人生行樂耳、須富貴何時、吾功名旣立、正欲歸身草萊耳、其年以疾遷金紫光祿大夫、改封醴陵侯、四年卒、時年六十二、高祖爲素服、舉哀、賻錢三萬、布五十匹、謚曰憲伯、淹

少以文章顯晚節才思微退時人皆謂之才盡
凡所著述三百餘篇自撰爲前後集并齊史十
志並行於世子薦襲封嗣自丹陽尹丞爲長城
令有罪削爵普通四年高祖追念淹功復封薦
吳昌伯邑如先



